

四庫全書

集部

欽定四庫全書

俟菴集卷十四

元 李存 撰

記類

羣木軒記

魏亭劉生震闢一室讀書其間室之外有松有櫟有樟有楓有樅皆百本高者數尋大者十圍其師顯民楊君題之曰羣木軒他日來徵余記余曰人患乎赤日之烈也而子之軒用以陰人患夫居處之暴露也而子之軒

用以深風之秋也而子之軒先涼露之夕也而子之軒
久潤子之愛於羣木也其以是而已乎曰然曰子徒知
羣木之可愛而未知羣木之可師也夫木之適於用者
松為上櫨次之樟次之楓櫪為下或貴而梁棟巧而雕
斲華而藻繪又或賤而薪樵棄而灰炭遇蟲而穴得濕
而腐木亦未始樂於貴而悲於賤也貴者亦未始自賢
而賤者亦未始自歎也人咸賴其用而木亦未始德焉
用與其宜而木亦未始怨焉曰木無知木無情吾子之

為是言也殆亦未極於理乎曰夫木萌於春蕃於夏悴
於秋槁於冬亦胡為而然哉是故木非木也人也天也
知木則知人矣知人則知天矣然則羣木非吾師乎作
羣木記

清明閣記

夫人之居處也不皆在於安其身亦必求以養其德是
故病於湫隘者宜即夫亢爽以自開汨於囂襍者嘗擇
夫靜虛以自遣撫之金谿族大而蕃莫若火原之余有

君儀父者獨依其里之東山以屋子曰琇玉復構閣於旁而詩書賓客焉閣之四面皆高山大林前為深池池之上佳花美木而自題其楣曰清明蓋取諸戴記清明在躬之義也他日徵言於僕以記之僕曰遠矣琇玉之名其閣哉然則果名乎果實乎名則僕也無所於言實則敢請其所以必也默坐收視不與外物膠而謂之清明則或類於禪寂者矣必也玩弄雲月侶鸛鶴友鹿麋放浪形骸之外而謂之清明則又將流為黃冠者矣琇

玉有父母有兄弟有妻子有僕妾外有公上之應酬內有私家之經紀其必擾擾焉憧憧焉於日用之間亦惡乎而清明哉雖然吾嘗聞之上達之士雖視而未始視也雖聽而未始聽也至於言動莫不皆然事物之來如水之止如雲之行無禍福利害得失老少死生窮達之分夫如是斯謂之清明矣故曰心外而求心則不足以得夫心事外而求事亦不足謂之事矣僕之聞斯言也久而有愧於斯言也亦久今琇玉之為名也殆亦有志

於此者因其徵言樂為之道而并識夫僕之愧也琇玉之子曰奎世富足而好禮樂云

重修崇真閣記

崇真閣者撫州金谿縣后居里之后土祠也宋初吾何氏某世祖員外府君由邵武徙居於是有后居之名相傳員外避亂隨兵后車而至事遠莫可考當其時斯里蓋榛莽也歷數世生齒既盛於是始有聚居若市井然建炎間從祖三十六府君始自維揚蕃釐祠迎后土之

神歸而祠之祠在市之南凡水旱疾疫禱輒應皇元大德初祠宇凋零祀事幾息我先人南唐府君復因舊基而新之中為正殿傍設兩廡外為門門之外豎雙石像日月左右列之後為閣閣可坐四五十人望其壁畫星斗像故號為七星閣館學道之士以洒掃之歲三月十八日設醮祭遠近至者甚衆率為常由是后居之里往往物不疵癘而民無札瘥我先人即世祠事日以廢弛棟宇日以傾敝竊惟后土雖不在國之祀典而是祠者乃

上世之所剏建厥廟宇又先人之所改作豈宜廢墜而弗顧至元戊寅出統鈔若干買其基於族黨施而公之可永為后居不廢之祀既又得族之樂善者某人等議同而力協由是規模粗復其舊既畢衆咸謂是祠之完一足以安神祇次足以慰祖宗宜書於石余謂區區之是舉也政恐不足以紹述先志又奚以刻石為然尚慮吾之宗屬里之居人猶以斯廟為吾家之私業視其廢興忽焉不加喜戚於其心也是宜勒諸石以告來者自

今以往苟有傾毀人得而葺之庶斯祠之不朽云耳

葉真人祠堂記

友人葉行叔曰里之王宗嶺舊有葉君祠君吾祖也以能致風雲雷雨役鬼物事唐玄宗拜鴻臚卿封越國公後為神宗崇寧間錫號真君歲久祠且圯偕從弟克承改築於青山之陽為屋若干楹中祠越國夾以兩室有門有廡嘗聚族謀曰吾葉氏得姓尚矣其散在四方者不可考近自晉蒼梧太守六世而為越國又五世而為

唐信州雄石鎮軍民鎮遏使由雄石至於今凡十五世
日析而日遠矣縱吾與若輩不敢忽而忘其若他日何
吾欲自高曾而下主而列於東室高曾而上溯而至於
蒼梧列諸西室歲正月三日集祭越國以及於東室其
西室禮而不祭昭不忘也可乎衆欣然曰諾吾且入田
以瞻懼其久而隳也敢請記之余曰祠祭古有法烏可
苟曰越國江閩間通祀之顧吾子孫乃不得祠耶祠越
國水旱也疾癘也蒼梧雄石以下何為曰祠吾子孫作

也且昔之鎮今貴溪縣是也雄石因家焉是為貴溪之
初祖然則蒼梧於越國先也何以旁室曰祠為越國作
也東西室何以祭不祭曰遠近也高曾而此焉食寢則
廢歟曰從越國於歲始也余於是不能詰從而謝曰子
之宗誠賢子孫也余小人不足以及此世固有謾不省
其所自出者亦有視同氣如途人者又有崇私積怨操
同室之戈者今子之為不唯興夫尊祖敬宗之心深足
以厲爾後之人不唯厲爾後之人亦足以厲夫世之薄

且偷者傳曰禮雖先王未之有而可以義起者非此之謂歟行叔名必勉克承名繼清為老子法龍虎山中嘗被璽書賜號全德純素通玄法師云

橘隱亭記

信弋陽之南有山曰寶峯廣袤幾百里白雲吐吞瀑泉怒流嘉樹豐草陰翳蔚然與靈山龜阜相峙立俞氏世居其間若隱者士皆高蹈絕俗以明經振其家聲比比而是弱冠時嘗願一遊逮今老矣如有所逋負然至正

九年冬俞某以書謂余曰昔吾母年高嗜橘嘗治圃百
本為奉母也親沒而不忍忘其所好因引泉為池作亭
其上存乎吾所思也暇日登臨或琴而茶或觴而吟以
燕息賓客馬清碧杜公扁曰橘隱亭名公咸詠歌之敢
蘄吾子一言以為記使後之子孫視斯亭以為勸余曰
記者記也予未即斯亭觀其所制及其所有將焉記諸
雖然物不自美因人而彰况篤以孝思秉彝之心不違
其親而好事若此寧得已於言乎故夫思之不可以不

慎不然視橘擬封君之富視亭為娛客之計又安知存乎所思也必曰吾視也何以視吾聽也何以聽吾言動也何以言動朝於斯夕於斯飲食必於斯造次必於斯顛沛必於斯如是而思而不忘其初則世之慕其親者孰得而過之余故於橘隱亭記之請重有感焉宜乎後之賢者有所承式某別號竹居清重溫文鄉稱善士其子文明春秋尚書禮厥後綿綿繹繹由孝友而致功名者非君之子孫而誰歟

玄一堂記

玄一堂者茆山劉煉師休焉修焉之所者也劉之言曰
人於茲世也者其無乃累乎馳而外者其無乃累累乎
今夫狠者鷙者虺者蠆者栗焉而跼跼者叫呼而慙頓
者紛且錯也吾故於斯焉託也生於斯其為條條乎死
於斯其為消消乎是故物靜而年事靜而天吾於斯見
玄焉見一焉因以名夫子記諸余曰噫子之為此言也
予何為嗇之而無以遂其託也是為記

稼圃堂記

稼圃堂者餘千鍾式時萬曾大父祥叔氏作於宋紹定間以自燕者也歲久而圯其父直翁又更築焉又且圯時萬葺之以完而請特書於學士虞公而揭之楣他日以書來徵記於余且曰吾聞諸先子曾大父狀貌魁然過童稚若大賓然其視聽靜而端雖獨居必正衣冠今堂也粗不隳敢告一言以詔夫後余嘗造時萬賓客之在坐者濟濟子弟之在列者彬彬琴瑟備張而圖書滿

前欄有佳卉而檻有奇石也游其場適冬且盡積秉如
墉布櫟而落其實擊扑之聲自雞鳴至於夜分因意其
曾祖才質之美若可出用於當世者而猶留情於稼圃
何其自紹定至於今百有餘年矣自其曾祖至於曾孫
亦既四世矣世固有父兄諄諄乎耳提而面命而其子
弟若弗聞也者能從於其生而背畔於其死者蓋已寡
矣今鍾氏之家大於昔者倍子孫衆多於昔者亦倍而
於斯堂也更築之葺之求特書之且記之唯恐一日而

失前人名堂之意亦豈非教行於家事不偏廢彌久而彌篤彌衍而彌不匱者如此夫稽之於詩實方實苞實堅實好麻麥朦朦瓜瓞嘽嘽后稷之稼圃也而七月之作又出於聖人之手率多農圃衣食之言列之於經習之於天下後世用之於朝廷宗廟其誰敢鄙之由是觀之一自天子至於庶人孰不以是為之本歟貽厥孫謀以燕翼鍾氏之曾孫有焉是為記

散木亭記

龍虎山中道士周君微之築亭於其後園繚以崇垣環以明窓古書名畫壘爵鼎爐之屬無所不設將以自宴且以安賓客也而每有取於莊周櫟社之喻之言而扁之曰散木他日以書來命余記余曰莊氏殆亦欲行其所無事而惡夫鑿者耳不得其旨者徒取其糟粕粃糠由是或恣睢放縱壞爛而無所檢束似高而不中似激而非和者之所為也然吾又嘗謂夫衆人之視木梁棟若可貴而薪樵若可賤也然則梁棟吾所以避燥濕寒

暑者薪樵吾日用衣食之所資也未必梁棟可有而薪
樵可無也亦何必梁棟之貴而薪樵之賤乎然則孰謂
之散孰謂之不散故曰智慧之流是非如戈矛勿事分
別則亦無所議說此又莊氏言外之旨也余嘗及識微
之於其山中其神峻以清其氣深以弘其於三教之書
無所不覽又嘗從師於窮崖絕壑之端以講夫道德性
命之微而復能以其餘力賦詩鼓琴為大小二篆書不
汨汨於俗下不蹢蹢於方外故余特求夫莊氏之所未

發者而為之記云

鍾氏慕堂記

餘于鍾式時萬葬父母於習泰鄉之清原他日過余而言曰式年十有三而喪父二十有三而喪母顧疾病不能竭其誠葬埋不能究其禮祭祀不能必其享今三十有七矣駸駸乎其衰雖嘗築室於塋域之傍時一洒掃所以備食息風雨者舍是亦安所用吾情乎余歎曰俗之不厚久矣固有朝死其親而夕忘者少隆焉旬朔耳

加隆焉則亦期月而已矣古人云孝子終身慕父母盍
扁之曰慕堂然則子亦無徒事於孺慕為也聖門之論
孝隨其等衰而發其旨義且子以為親果死乎其精神
蓋無不在也子其正爾心敬爾身隆爾師友教爾子孫
守爾田廬睦爾鄉黨或出而從事於當世毋殫厥職而
敗乃事夫如是可以弗辱可以全歸吾知子之親必將
欣欣然而來享亦豈必春秋朝夕歆歆慄慄一物一念
而謂之慕乎時萬拜曰善乎吾子之言也式雖駕下敢

不勉強乎且請書而刻諸堂之右

復琴記

龍虎山中上官鍊師九齡嘗得一琴於蜀人王氏其陰之刺曰秋聲有既明者為余言其伯父郢州通判伯堅所收也初郢州以善琴客宋史丞相府會理宗召天下能琴者十人入禁中教宮人琴郢州寶愛之寢處必與俱沒而歸於鍊師鍊師之寶愛猶郢州也其師玄教大宗師吳公久在朝適貴人有好琴者聞秋聲從大宗師

索馬秋聲在江南取未至而先以他琴獻材不下秋聲
故得復還他日余游古象山道謁鍊師適當秋半之夕
鍊師為一撫弄真鏗然金石聲且曰吾宿昔亦何意其
得此也既得之又何意其未及終吾生而去也既去矣
又何意其復來也吾子試為記之若何余嘆曰古今天
下之間事事物物亦何莫而非是琴類也且當時作之
者吾不知其何人傳而寶愛之者又不知其幾何人而
後入於宋之內府而至於王氏以及於師也雖得之而

復似失之既下之而復似上之是皆偶然者也然則舉如是而觀之則吾又將因夫琴而進於理也矣是為記

山樓記

龍虎山中周仲簡之私室獨在其西偏已多得夫古木修篁幽泉奇石之勝而復於其寬隙構小樓焉余他日偶來山中仲舉延登為燒香煮茶凡層樓傑閣之絢麗遠峯近嶂羅列於窓戶者不轉盼不移武而盡得之也又他日以書來俾記之余嘆曰仲簡亦既出乎塵襟而

寄於幽勝者矣而又欲求其益幽益勝者而藏息焉非
唯惡聲惡色纖芥不接於吾之耳目朝夕讀古人之書
其微旨與義或賦詩屬文會於心而發於口者必多於
是樓焉得之昔人謂仙人好樓居豈其然乎矧仲簡又
嘗登華蓋浮洞庭求搢紳先生而謁焉飲其議論懷其
文章歸而溫繹於斯樓之上其進德修業也孰禦是為
記

榆原真館記

榆原真館者龍虎山孫公久大之所作也公幼入山為清靜言他日遊其東北之支得深谷長源豐草茂木水石縈護人跡罕至顧而樂之曰吾死其以此為歸乎於是命弟子營之其蜿蜒而豐潤者則虛以為公藏其寬衍者則為屋以守既成而扁其堂曰榆晚榆晚之左曰久軒公往來所燕息也右曰蘭雪齋古書畫器皿所陳也外為門而總額之曰榆原真館云又五年而公卒葬焉至正癸未之秋余登古象山遇其徒周微之於碣石

微之曰計子及山下莫矣其宿吾榆原乎從之食寢如
歸明年夏以書來曰曩宿子榆原者意必有以記之也
敢請因嘆曰吾見人之營其墓地者孰不欲美且固久
也然既沒後之人或汲汲於其私而累歲不一跡焉甚
者貧無行黜其守而奪之利曾不旋踵而瓦礫其屋狐
兔其丘者有矣今孫公蓋老者也生而樂於斯死而安
於斯夫亦何所芥蒂然而承葺之者唯恐其或弛掃除
之者唯恐其不時無以異於公之平日是固出於福德

之餘施亦由其所付託多才而能賢者也

玄真宮記

玄真宮者故宋樞密馬公天驥之第也初公無子一女
曰時閨前潮東肅政廉訪司監司黃頭公聘為夫人夫
人亦無子黃頭公卒歎曰我於黃頭氏雖無子賴有他
室子可以不為其宗憂顧以一身承吾先人顯宦之餘
而女子又義於從人不可以繼世縱子他氏繼之勢或
不能以永思所以永之者遠經而近宜莫若身為老氏

學為老氏學則士夫良家之女樂從吾遊者即吾徒也
即吾徒則必能世世祀吾所自出無隳也且吾聞之老
子之學貴於清靜清靜則神完而氣專可以達於神明
苟可以達於神明則上為吾君祈天永命次而雩焉禱
焉歲時所以從有司為斯民者亦將無不為也於是因
第之廳而為禮神之庭堂為集衆之堂穹東之廡而鐘
馬嚴外之門而象焉其餘曰庖曰湑或因或革一者不
可具舉廩士之田皆因馬氏舊某年間屬有以其事上

聞者皇帝憐嘉其意為降璽書若曰有司徃役其無與
凡而器用財賄土田強有力者不得奪特賜今額仍賜
時閏號純正守真端靜法師提點宮事甲乙住持久之
又有以白見皇后榆河者皇后亦復為降旨以鎮撫之
壽昌縣尉胡君天祥嘗為僕言且徵記焉嗟乎古今天
下事物之不齊者多矣或得於彼則失於此以常情觀
之孰不謂馬氏以公侯之貴甲第之華土田之多不能
有一子孫保之享之而乃處給乎黃冠羽衣者流豈不

大可感傷而悲歎然使幸而有子孫不幸而其才不能中人則亦未必世為馬氏之物而嚴馬氏之祀矣今而閭里相傳不絕於口者豈不皆曰斯馬氏之所建致也况顧而祀於堂盡馬氏之宗又况山川之靈宜為其學而有成以酬其志為其學而有成以酬其志則冲和之應將被於物而無窮不在其身必在其徒此其為義尤未易以一家世裔之私謗焉而比量之由是觀之則斯宮之建上承君后之命之重夫豈徒哉敬為記之如是

重修柳君廟記

宋寶祐末江南悉內附提刑謝公枋得猶集兵饒之安仁縣軍校張孝忠河南人或曰淮西人總健兒三百人謁麾下公為陳忠義事以獎之孝忠即感泣請留俄而北兵來襲謝公走七閩孝忠領孤軍出戰手刃百餘人馬口中流矢孝忠自刎北兵覆以錦袍惜曰壯士壯士既而孝忠後數著靈異遂配享東廡下嗚呼昔襄圍告急之日士大夫輕去就疑羨世祿之卿連城之帥往

往望風歎附孝忠特一小校爾非有詩書禮樂之培養
非有爵位土田之寵固奮不顧身於不可為之時以報
知己以謝公之義正則事之以柳君之靈明則附之雖
其資過乎人亦可謂生死知所從者矣宜乎死而神牽
聯而得書

侯菴集卷十四

欽定四庫全書

侯菴集卷十五

元 李存 撰

記類

春暉堂記

予嘗浮信溪而下見瀕溪有石屏然而起其上如橋梁
中空通而圓有樹葱葱蓊蓊余喜之舟人謂此鄉所謂
月岩者以似故名每以不及泊舟一登覽之嘗用不滿
於懷他日過昭真宮訪道士徐仲德仲德曰吾有母老

且多疾遂營藏於鄉人所謂月岩之右堂其傍以奉之
扁之曰春暉距宮二里而近庶幾可朝莫焉子為記之
若何余曰信佳所也是異時吾愛焉而不及即焉者也
且君以是而名堂豈非有取於唐孟郊之詩乎郊之詩意
謂親恩之罔極猶三春之暉也子心之厚報猶寸草也
喻其恩者大而報者小也是豈情動於中而形於言感
於其言而名諸堂皆孝子仁人之心也然吾見世之為
釋老者多矣一去其家外得所游從則或介然於骨肉

之間是固昧於親疎厚薄之義無足道者至勤勤於其師友眷眷於父母兄弟者亦為不少今仲德也既不得不離於膝下又不得致養於宮中卜其宅而堂焉以安之朝往暮來焉以娛之如是則不違於事親不尼於從師亦庶乎兩得之者矣且吾異時徒以水竹之勝不及一即其所為恨今則又知仲德奉親其間居室之完器用之具甘滑滃髓之宜無所不勤愛和愉悅之心必不少懈未能一敬觀之而先之以言是終不滿於懷者也

處晦堂記

臨川危君允吉一再以書來曰僕粗守先君子之敝廬有燕息之堂者學士清江揭公以處晦扁之意謂先君子之老適當江南內附之初會有大臣薦之者朝廷凡再聘而憊甚不能行也堂之傍有古松一本其大十圍皮膚若鱗甲有若鬚髮出鱗甲中深黑長數寸而下垂者又有古桂七本各十圍枝葉覆地花時香聞十里吾得徜徉其下旁皆良田四時泉流不竭吾得而耕之今

吾亦豈有肖似於先君子者而敢據是名以為高顧夙
夜求所以弗辱焉耳惟執事賜一言以淬厲之若何余
曰吾聞之君子之道未嘗一於出與處也惟其時義而
已矣逢其時可出而不出固也者懷於安而遠於義也
非其時可處而不處褻也者役於利而近於辱也是皆
不可之大者也今吾子為前代縉紳之後論其學則博
考其行則脩察其材則通今公卿大夫由經術而出者
相望也發策決科豈吾子所不足哉吾恐其不終於處

晦而已矣矧聞其先君子見心先生風骨炯然蓋神仙
中人以詩名當時然則君子之澤殆方流而未已也歟
至正庚寅春正月作也

應天寺記

餘干州習泰鄉梅港之上有寺焉按郡誌敕宋太平興
國間用望氣者言有所厭故額曰應天云建炎初兵火
焚蕩盡無碑碣可攷僧義曉者藉施助首構佛殿成頃
之智宥智宏正勤繼榮可勝共力而法堂兩廡外門經

藏成又頃之可久千財閩廣而鐘樓成里鄒某為鑄鐘
且田舍若干畝文殊寺僧立亦田舍若干畝孫某為像
觀音於堂復圖刻諸因果故事壁間胡某建聖僧堂亦
田舍及園先是經藏所隘王某移置寬隙飾以金碧取
經錢塘以實焉李某命工作香案堂上他日衆相與謀
曰寺之燬顧經營五十年而粗完不亦難乎且故無土
田今則不饑豈可以弗之記也皆曰然初長沙吳文王
為有將曰梅鋗亦以功多封侯相傳生此沒葬此故有

姓港而居人至今多梅氏寺因有其專祠至正初同郡彭君某來巡檢鍾方寨逐逋寇於閩道謁祠下謂寺衆曰侯以才智翼楚漢蹶強秦固見諸史幾二千載而其神猶赫赫如是亦不可弗之紀也衆又皆曰然於是可久造吾廬以請因曰古今天下浮屠之宮率悠久而不廢縱廢而復興不旋踵者何也由其多得山川之勝且世有人焉故也吾聞應天之神自大江之右蜿蜒百里而至左右復多奇石以翼衛之大溪小澗凝清流穢長

松高竹掩映空隙其僧自義曉而下凡七八輩皆苦而敏於事故能致君子長者之助如此其盛而廢以備舉可謂有其人然則寺之昌且久也蓋有不待度而前知者矣是為記

否庵記

上官君叔泰築室於家山之陰蓋邇於父母之藏受命於疇昔者也室成鑿池其前清深而魚連山奇石之在數十里外者皆羅列庭戶別築數楹於其西而自扁曰

否菴以燕息賓客焉他日過余請為記之予曰夫名之
美者人之所同取非美者人之所同舍否也者塞而不
通之義也君獨有取焉何哉君之弱冠也即宦學於京
師未幾出而主簿常之武進袁之萬載尹太平之蕃昌
衢之江山皆有惠政民不忍其去今則又調般陽之菑
川以常情窺之似未始否也豈非以其同時並進者或
晝三接而歲九遷而已獨遲回於州縣之間者耶不然
則其字曰泰理不常泰否必承之無否而先自否也吾

聞之恬於崇卑利鈍之際而憂深思遠者其惟君子乎
若夫中人以下其視也不出於尋丈其聽也不踰於牆
壁是以器之本窳者未盈而先覆趨之過疾者欲達而
反蹶也禍而後悔害而後懲不亦晚乎今用是以扁其
室無乃自寓警戒之道焉嗟乎君之年方艾而未耆服
官政之日長也而慎重若此其能他日以功名終者非
君其誰是為記

棣華堂記

臨川雲林之山廣袤幾百里傅氏世居其間以明經顯
以武斷保鄉里者前後皆有其人其居於白蟾者兄弟
三人長梓字元達次煥字元明次魯字元宋甚友愛也
能遵其先人之命毋析居異財故自名其堂曰棣華蓋
取詩常棣首章之言他日來請記於余余諾之數年而
不酬忽自念曰言之求無乃欲益聞乎李正卿嘗緣事
平江為余言平江有某氏者兄弟三人父母終孟生殖
仲應門季幼唯嬉遊不事事二兄詬弗悛且常索酒肉

以飲食其所與遊者久之二兄謀曰李也殆不業乎莫若分而聽其自覆既分季置酒召所與遊者觴而曰吾疇昔孟兄力生殖仲兄持門戶吾無所為故能與諸君遊也今則肩負不能從諸君後矣請由此絕既而生息日滋二兄日乏業歸之者半惻然曰向賴二兄前公私皆給故長我逸我有分以及我今二兄乏若是其復共乎妻怒曰若往遊時若二嫂指及吾面者幾曰家之索必汝夫之由若何復與共不聽聚其宗而焚其券如初

嗚呼孰謂衰俗下甚絕無君子是厚誣也平居以稱度
為心者分財而錙銖甚則聽婦於內交讒於外而無不
為其人豈不自智視彼平江無乃愚乎傅氏固儒家薰
陶講貫之日長宜其賢也彼平江者賤財貴義蓋得於
詩書之間耶果出於心自能然也抑所與游者朝夕開
迪而誘勸之也嗚呼至誠之道通乎天地合乎鬼神可
以擾蛟龍可以蹈水火可以冒鋒鏑或馴虎兇之暴或
感木石之頑矧孝友乃其常分或失其人乎哉正卿非

妄士物故久矣雖不記其所稱者之姓名而亦樂為元達兄弟道也是為記

看雲聽雨樓記

樂平陳子構二樓於屋室之旁一以看雲焉一以聽雨焉李存聞而謂之曰夫世間之物有形有聲者何限陳子之看聽獨專於雲與雨者何耶且雲之與雨油然而作沛然而下而後吾之所以看之聽之者隨之或玩之而有悅或厭之而遂悲不知方其未始作也未始下也

而吾之所以看之聽之者果何在耶又不知及其既作而滅也既下而霽也招之而不可得望之而無其所而吾向之所以看之聽之者又果何在耶又不知吾之所以儵焉而看儵焉而聽者與其油然而作沛然而下者果有以異乎否耶又不知雲之與雨其形其聲千態萬狀至不可以象類言者亦有意乎人之看聽而然否耶明乎是則雲即我也雨即我也庸詎知夫子之所以看雲者不猶雲之看子耶子之所以聽雨者不猶雨之聽

子耶非看而無所不看非聽而無所不聽則將於二樓之間目之所接耳之所遇足以證此理於無窮者又當不專在乎雲與雨也

心隱堂記

胡君茂卿以心隱名其堂請予記之予曰迹之隱者或為人之徒心之隱者多為己之徒是故文茵華轂有不足為之貴也巖居草食有不足消其馳也茂卿市邑人也堂焉而名之以此其無乃有志於為己也歟然心也

者惡乎而謂之隱惡乎而謂之不隱謂之隱也亦何所
置之謂之不隱也亦何從執之初茂卿以通敏得推擇
為縣曹余觀夫世之人未有所立而遽從事夫政也充
訕乎聲勢之場汨沒乎貨利之淵其於日用之間亦鮮
有不憧憧焉而不知止滔滔焉而不知返者今茂卿則
泊乎殆無慕於外脩乎殆無所斲於人之心也雖謂之
無所隱焉蓋不可也然其於斯堂之間隆師友以導子
弟惟恐其不為善人時尊俎以洽故舊惟恐不盡其歡

心以巾以帚而未嘗纖塵也或琴或書而未嘗虛几也
爐有焚也瓶有折也堂之傍又有一畝之園花木菓蔬
必身理之宜鋤而鋤宜鍤而鍤瘁而糞之藁而灌之之
心也果謂之有所隱焉亦不可也然則初無隱也亦無
不隱也茂卿能於是焉觀之則予雖為君記斯堂也而
實未始有所記也

雲錦觀記

上饒龍虎山二十四巖之下有方石焉望之爛然而紋

相傳曰雲錦石漢天師張君嘗鍊丹其下後之學者從而廬焉宋崇寧中得賜額曰雲錦觀已而廢於兵紹興間有周昌臣者始葺於鐵壚原未幾而昌臣死遂以復廢淳熙間都錄劉君用光以道術顯於時有撥賜沒入田而以食其衆慶元間倪元興病其卑隘遷於楊家塘旁有古井謂能時出五色雲氣似更與雲錦之名宜者然苟合而未完世祖皇帝一天下貴清靜之教上清宮道士葉君繼靖住持茲山他日因循觀而南可百步顧

而左臺山右塵湖前為應天諸峯而後則雲錦石也因喟然嘆曰茲豈非天與神授者耶遂議以改為請於主教真人而許之大宗師吳公亦親為之按行耆德傅君應辰又助之役為殿堂門廡凡若干楹庖湑庫廩各以次舉共為工一萬二千有奇嗟夫吾嘗經行茲山間亦甚愛其廉厲潔削洞穴祕怪而草木菁潤宜乎慕道高世之士擇焉而居之殆紛華之境不交於前而塵垢之事罕及也然茲觀者再廢再興凡五遷而始定其無乃

有冥漠之相為幽勝之尤者耶夫如是則其於制鍊吐納之事將益靜而益專成於已而及於物者必矣葉君字克承儒家子其先古睦州人秀而通茂而有恒大德中嘗從開府大宗師張公於京師璽書授全德純素通玄法師教門高士紹興路瑞應宮提舉知宮領本路諸宮觀事既又捧表闕下再命提點雲錦觀事云至順元年八月十五日書

侯菴集卷十五

欽定四庫全書

侯菴集卷十六

元 李存 撰

序類

贈祝蕃遠序

大學之道不明於世久矣繇士大夫靡然以文藝相許
與至有能自持而不流得之於千一者則又謏謏蹢蹢
焉何斯文之不幸也上饒陳先生立大潛心於聖人微
言而履踐之未嘗一泥於訓詁蓋二十餘年而人莫之

知也雖其弟子祝蕃輩亦皆卓出於類存欣然慕之將以明年往造其門上承先生之教下取蕃輩之助既而聞有司舉蕃茂才異等宜中其科牒而致之行省去且有日存私心甚惜久則大喜何者江淞之士號多秀敏而又共際於四海統一之時光深弘厚之氣有入於其心修省變化之言易以相感夫然則是蕃暫棄一存於近而得存於遠者有不可以算也是則無所於惜而有大可喜者中否於科未論也

送張仲舉明春秋經歸試太原序

國家以科舉取士士之選必由於其鄉延祐七年春張仲舉將由錢塘歸就試太原不遠千有餘里以書來徵余言仲舉明於春秋者也春秋聖人是是非非之經也故曰知我者其唯春秋乎罪我者其唯春秋乎然昔之傳是經者固或溺於臆說後之號為通是經者亦多託之空言經之不明其來尚矣吾嘗謂使真知春秋者一日而由乎科舉得為政於一州一邑而推是是非非之

義以是非其民則吾見春秋之義明於一州一邑者也
又使得序而進立乎朝廷之上而推是是非非之義於
吾君吾相之前則吾見春秋之義明於朝廷之上者也
亦豈非夫子作經之意哉亦豈非吾君吾相求明經者
之心哉亦豈非吾民之望哉亦豈不大可為科舉慶哉
苟其志不於此乎在而汲汲焉於窮達利鈍之際則其
於春秋是非之義為何如耶仲舉諒直君子也其必審於
斯義而非託諸空言者之行也吾意其鄉之好事者

必相與樂推先焉而有司之明者亦將無所失也

南徐紀行詩藁序

南徐荆揚一都會也濱海門控大江山有金焦丹陽吳會連其東漢沔接其西魚鹽米麥之商往往而集前年里有轉轂於淮者謂存可附致一遊時存教授於家不宜曠然以去且雅不便舟中拘縮以故止然念念未歇也大德十二年淞東西大饑南徐尤甚郡命邑宰汪君稱隱部糧五千餉之君自始發訖家幾百數十日凡慊

慨乎登臨之際鬱怫乎事役之餘以至於羽人釋子之所棲息篙工漁夫之所便捷鯨豚之奔播鴈鳬之紛呼濤瀾草樹風帆烟檣以吁以釋者一寓於詩靡遺焉他日以示存蓋百餘篇讀之竟殊歡然有得是吾於南徐也可謂不行而至已矣雖然林岩之士其蔑有貧窶蟄蟄如存者乎庶幾君詩之傳之廣也亦必有得存之得者矣於是乎書

江淮運餉詩卷序

士之不能持深守固一遇利害如髮則倏然為之動矣
若是者烏足尚哉紫陽汪君來簿安仁之一月潤饑移
粟於郡郡檄君部之君得檄即行絕大湖浮長江帆檣
數千里犯濤瀾之掀播觸蛟鼉之隳突虞於盜賊危於
疫癘以常情測之孰不歎其勞苦險遠鬱然而不夷者
而君之歸也曾無幾微見於顏面方且披翫雲月吟咏
性情弔古人之陳迹訪草萊之修士德業無所弛公事無
所懈豈非利害素定才智有餘持深而守固者耶他日

為大官臨大事優游容與蓋有未見而信焉者矣好事之君子咸賡歌以美之而屬李存為之序云

贈貴溪縣梁尹序

百司之接於民也者莫州縣官若也州縣官之恒其位正筆而舉錯之者莫尹若也是故宰天下者考績之際宜於尹焉先得其人則一州縣之民安不得其人則一州縣之民不安國朝縣有監有尹有丞有簿六曹之吏有典叅理也制則密矣然豈能皆心於為民父母者哉

假有一事焉或雜舉繁例以嘗其明或播誘兩造以撓其正決而行之則議之以為專固而持之則詘之以為私由是而引歲月飾案牘其有能盡達於民情也者幾希梁公天泉來尹信之貴溪縣且六年安仁與貴溪接壤也而公之聲政日聞也果於斷允協於同寮闢公田不勤於細民進衣冠而尊禮之辨崛強而制抑之其亦必精心拔慮人百其身者也今且去也而何君時叔者邑之佳士人也倡為詩歌以惜美之而徵序言於余是

用書所聞焉

贈陳仲達序

余幼多疾一嘗從醫師涉神農黃帝之書下及張陶孫
許數十家言欲以稍知疾疢之所由起金石草木寒熱
溫涼之所由用既而姻友間意余卒業踵相問或內顧
而難之則咎余要祕也一八十媼痰吼上氣脉急出余
曰脉當病可作蘇子湯一劑已明日死也一女子脹急
不穀余曰此血閉病也法當以乾漆三稜輩治之不可

更醫則孕氣不和證也一女子苦濕痞脉肥肥溢指余
曰不害明日作猪苓湯投之已晡時死也一男子溫熱
上滿下泄鼻出血余曰在傷寒法此為陰陽離絕不治
更醫乃已嗚呼茲事豈易言哉古之人不涉獵以為名
不欺虧以取利幽探於五行之運著察於風土之宜然
後審別製劑而中若余者志學於儒家者也不專徒兩
失之今絕口不言醫邑人陳君仲達緝其家緒而精心
焉仲達博采強識皆出於余而又勤勤然不已勤勤焉

不已亦豈有萬一如吾所為而吾猶瀆告之者何也愚者之嘗謬而智者之取鑒也

送朱可方序

朱君可方退然有慕於晉陶處士淵明之風俾朋友之能文辭者咸述之而僕且疑焉蓋嘗聞諸長老前五十年東南士君子之有志於四方者局局然惴惴然不得過大江一步今幸遇明時際天極地無不交車轍馬跡焉而聖天子又憂乎林岳之間有不屑於自進而非常

調所得者復為成周賓興之禮以來之夫如是則士之
進者或可以少愧而上之求者亦不為不盡其道矣可
方優於學而未始仕也而年又未始老也析經義之精
微陳古今之得失非可方所難使一日勉焉旅進於場
屋之間有司未必失也然後唯我天子所命陳力就列
他日老焉而歸過彭澤舉一觴以告淵明秫田而飲種
豆而食籬其菊而逕其松未晚也雖然僕非有動於勢
利而為是言者顧以勤苦而為學遇夫有道之世不安

於獨善其身者當然也

贈吳伯厚貢士序

自名實之辨末而取人之道以微蓋由來久矣入國朝制天下州郡歲舉茂才異等者二人士之稱在茲選者繇郡牒而自達於行省由行省而自達於吏部御史察之國史覆之然後命以九品文學官亦可謂級焉詳焉宜得人焉者也至大二年春吳君伯厚以牒行過別於余責一言以相奮余曰嗟乎天下至廣也歲牒而往者

至不少也亦豈有敏給而文十一如吾子者乎亦豈有為國家典茲事者不能別吾子於羣羣者乎亦豈有別而要之徒萬里之來者乎亦豈有成其名償其勤不說於君子者乎用是卜吾子之行之必偶也遂書以為贈

贈張舉之宣城後序

國家選人之制上焉曰儒吏兼以為儒不律則疎律不儒則粗然而今之持文墨之長者舉曠放而過情挾刀筆之能者舉苛深而多害難哉人也余居深山之中雖

未嘗一涉千里之外稍覽天下之俊美而近識李君正卿焉李君江西人有儒者之溫良而無其曠放有法家之縝密而無其苛深必欲試吏而取則李君真其人也李君嘗為廣西憲史矣見信於其上見愛於其下再調而尉安仁亦如之李君真可則也孔子曰空言不如行事之深切著明也今子兼二家之長才而有試吏之志故吾舉李君以為贈則見賢思齊擇善而從之義裕矣尚何他說之有乎

贈張仲舉遊宣城序

君子之於學也上不得名公卿大夫以開之下必取良友朋以發之不然皇皇焉汲汲焉古之人胡為乎爾也徐泳中嘗為余言宣城江東上邦也而憲府之所會也吾客居十有五年其大夫來者無不文墨論議以降接士儒其士子弟之遊從者無不遜順於訓克於有成其主人無不時月禮致問遺以安美哉宣城之風也余懷焉未之能往而張子先之張子中州人有氣義其文辭

慨然慕先秦西漢其詩慕晉魏盛唐勤業之餘頗願從事於當時者也而之行也豈不見接於名大夫不見接於名大夫亦豈不得良子弟從遊哉亦豈不遭賢主人以相處與哉

送寧國李總管序

延祐元年冬制江南東西道及浙西道民先自實土田時李侯某為寧國明年六月省命侯來視饒州之荒乙卯及安仁丁未是為七月之朔侯從邑大夫謁孔子廟

覩士輩之放疎視門廊之汙弊咨嗟久之進諸生而謂
之曰學校之所以隆於天下者才夫人而已耳今國家
復爾身廩爾食問辨則爾師游息則爾舍新天子又以
貢舉吏爾屬爾屬宜少自慎貴已矣若夫膠膠焉於斗
升之獲者是走夫賤人之事也非士君子之行也故曰
細人也服利君子也服禮禮也者敬而已矣為人子而
不敬失其所以為子為人臣而不敬失其所以為臣才
也者才之為人子為人臣之義也雖然吾為多言矣亦

蓋有爾侯爾大夫焉於是諸生皆深然而思躍然而喜退而相與為詩以美侯之教而俾某也序其首云

送王既明序

延祐二年秋八月壬辰雲錦山道士王既明奉其師嗣師吳公之命往主夫閩臨水廟神之祠過別於余且徵言焉吾聞自禮樂刑政之微而鬼神之教始著雖若幻若荒若不可度且詰者而善惡之復殆無毫髮舛焉君子明之衆人昧之是故或憑物而言或假寐而通或交

於陰昏之際或震於疾癘之間吾嘗以為上古之世之人日遷善遠罪宜不待夫爾也故我朝歲徧禮名山大川屢增祠官之秩皆所以敬鬼神輔政教也今子將夙興而夜寐贊乎神而接乎人陳其禮幣所以申其誠也肅容儀所以齊其心也通其言毋致其濫從其俗毋徇其荒因其中之有敬也因其中之有懼也導之為孝弟焉導之為忠信焉如是則神之所以臨夫人者有不皆在於驚動禍福之末而人之所以贊夫神者非徒私於

牲牢圭幣之餘者也抑吾又聞臨水女神也閩人相傳其親死於妖憤且報之亦死焉果然則孝心之烈登諸國典而食是邦也不亦宜乎

別汪子盤序

今以鄉試來錢塘適與友人新安汪君子盤會焉相問尊若幼無恙外君以別後所為文示余其辭氣多嚴重簡寡有以知其用心專且勤過於余也余數年來得師於上饒問學之際大抵謂聖賢之業之見於言語文字

者無非明夫人心而學焉者亦必於此乎究余則退然而懼幡然而省庶幾乎求免於雜而牯也而疇昔之知余熟者豈有多如君家父子兄弟者乎尚賢而樂於聞善亦豈有多如君家父子兄弟者乎深願與君共論而舍館適相去遠甚相過又輒不遇既又迫東歸而君微言至於一再思不可重相負也書以為別

贈浙道士程能靜序

余曩年館於邑之崇真觀有道士劉某者處州松陽縣

人也相與處數月屢言居松陽之卯山山有玄乙堂橘
趣菴其所營也請余文焉余意其嗜尚不類於俗為之
記其堂與菴且賦其歸今殆六七年每思之隔千里他
日有程君能靜來自浙氣甚清問其居則劉之邑里也
謂劉近所為事甚悉余喜如得劉也久之亦以贈言為
請其再四不異於劉余有以信夫文雅之習多在於浙
見於老氏者已如此儒而好學者必不可勝言由是相
率而詩之者五人予則序其故並欲以遺夫劉也

汪稱隱安仁詩藁序

至治初元之秋新安汪君稱隱以書抵僕曰吾主若安仁簿時凡賦詩若干首願子序之顧僕也亦何足以序君之詩然意君平生之所更嘗者多矣見於文辭者亦宜不少而獨於此乎微言其以僕為斯土之人游從之舊有以知其賦物之精切託興之深適歟君嘗由夫安仁調而為杭之錢塘及今則為金陵筦庫錢塘之為邑也土地大民物蕃方伯連率之所近涖百司庶府之所

交集朝徵而莫役星食而露止筦庫之間則會計之勤
稽檢之密變通之利或不周於細微委輸之重有不遑
於寢食豈不自念疇昔之在安仁也土無百里民不滿
三萬家退食之餘則所與先後而左右者皆絳掖其衣
章甫其冠者也興之所到有不自已條然而成大篇悠
然而成短章風雲月露之態於我乎莫遁林壑泉石之
勝於我乎無隱亦何暇計其位之卑邑之陋耶但見吾
詩之日工且富耳故今茲雖於叢勩之餘而猶玩乎其

時之辭諉諸朋友以章之者僕於是乎或有以窺君之心也然則古今天下之事無小無大蓋誠有難者矣惟君子求所以易其難耳害之熏灼固猶火也而利之汨溺亦猶水也苟能於此而兩忘焉則此心之良直而達之於事君臨民之際感而形之於興觀羣怨之音者皆無邪之義也抑亦奚易而奚難將見君之名位雖益高責任雖益重何適而非安仁詠歌之時而後有以信其進於詩者進於道矣夫至若推國家之治頌神明之德自

宜有大人先生係天下後世之望者為君不一述之於僕也不腆之言乎何有

餞陳又新真人赴京序

夫人之於行役也有遂焉而以喜有離焉而以憂是皆不得其性情之正者也苟徒具乎觴俎以樂之蓋不若發為聲音以和之然非其氣之所孚志之所同則亦何為而為哉二年冬十月龍虎山中明復真人陳公以其師之領祠官於京師也而已嘗佐之特往省焉真人遊

乎方之外者其止其行無喜也憂於何有而吾黨交遊之士與其徒從之秀茂者亦從而為之詩凡若干首俾僕序焉僕聞隨世之音形於草野之間者蓋著於朝廷之上今二三子之作也懋而豐婉而不淫其殆國家禮樂百年之所致歟且真人之此行也適新天子即位之初必將戕戕其冠鏘鏘其佩而服勞於類望之間酒醴之氣圭璧之光有以達其精明天子錫之公卿大夫禮之亦當有任二雅之音如召康公尹吉甫者美且及焉

足以備絃歌而永金石使千載之下於焉而興於焉而
觀者蓋可以草野餞贈之華卜之也抑吾又聞真人之
居山中也日與能詩者相倡和或過午忘食或竟夕不
事寢由是觀之則向所謂氣之所孚志之所同者亦信
乎其有徵也

侯菴集卷十六

欽定四庫全書

侯菴集卷十七

元 李存 撰

序類

送上饒黃熙序

上饒黃君壽卿教諭吾邑數月其子熙來侍左右將歸
凡與之遊者或賦之以寓畏別之情或詩之以結久要
之好燦乎其有章鏘乎其成音而俾余為之叙余曰夫
中人之情得從其親以宦遊者有不間於位之崇卑勢

之間要往往以娛目騁懷為務至或有嗜利之習淪入骨髓者亦或有徒荒蕩而不知還者雖將以廣其見聞適所以溺其身心如此而可惜者比比而是今熙之留此也從琴師交吟友及其歸也則求言請贈唯恐離羣而索居嗟乎其今日之所養固有可見而他日之所成獨不可得而前知乎

送龔太和隨天師入朝序

皇帝即位之明年詔江南張天師入朝八月丁丑天師

行選其徒之才且藝者賢有德者壯可行者若干人從而番易龔君太和與焉吾聞天師每朝覲時國有大祈禳則命之天師帥其徒為壇而醮焉懸鐘磬陳寶玉立五方旌旗其響應往往如桴鼓又聞其在道路也民有疾癘輒扶老携幼滿其車下甚至壅遏不得前天師則戒左右宿符篆囊而佩之俾一一得所欲而去嗟乎非天下之至誠其孰能與於此宜乎大賚於朝而有以及於其人也君今之為是行也吾見其被璽書而列於祠

官也有日矣於是乎書

送章巡檢序

安仁之西壤與臨川接其細民習於輕悍一有水旱輒羣聚相剽劫富家巨室至夜不能枕余兒時有淮人方君某者來為尉屹然長不滿五尺善騎射有膽氣三年所撲滅窮根株不少至今西壤人畏之而一二餘老兵猶能談數十年間庶政理修歲無大饑咸安生樂業而警戍之吏又往往以其暇裕撓民訴訟縱卒旁午雖幸

以代去然鮮有全善譽者章君齊賢之來為白塔也律
已以廉馭下以莊而白塔政為邑之西壤齊賢居官凡
五年如一日今其去也自其鄉之大夫士以至於販夫
牧子無不誦其美而懷其安異時使者之行部及有司
之吏議皆未始有所譴訶信乎其能官而有譽也歟昔
方君之去安仁也年已踰五十吾嘗謂使其人居邊疆
得自部一卒已上亦必有以立功後不知其何如每每
惜之今齊賢之去白塔也才三十餘耳而與人之論謂

方也以才章也以德其所以逢時効職雖有不同然者是皆人所不能忘也故因獲序諸公餞詩之末而並及焉

劉道士煉丹序

余未始讀神仙書蓋不通其制煉金石之方今醫家所常用亦十餘品而或雜之以草木臭味其扶陽抑陰救危疑於倉卒之際殆亦仙方之餘而養生之所不可無也然精其事者率多隱於名山大川之間惜不能徧訪

少探討焉冲虛山中道士劉範者頗有志於是嘗語之
曰古之君子凡所為者先其義而後其利故義著而利
隨之況丹者人之所服食尤不可以苟按本草朱砂生
符陵山谷形如箭鏃如芙蓉花者良出他土者率不及
其碎末者特糾工取耳又諸石或火煨醋淬擣須千萬
杵或水飛研如粉無聲不爾著人腸中能作癰夫凡而
售之誰得而辨焉在於不自欺爾不自欺雖欲坐進於
道無它岐也況丹之必售乎吾愛範之貌魁然範之氣

藹藹然故其所以望之者有將不止於是焉而已也範
字彥基又知讀書蓋儒家子云

送薛玄卿入朝序

至順元年秋九月龍虎山薛君玄卿復遊京師其鄉人
何素率其友之能詩者若干人咸賦以餞之而俾番易
李存為之序存曰君之往來京師也數矣雖萬里若適
鄰左然至則有大宗師為之依歸行則有供給之裕而
無旅瑣之況也似於人無所改視而易聽者而何以言

為顧君素有能詩聲往在京師時凡公卿之好文辭者必交其歸而居山間也非清流勝士則不與之接然則倡和之樂在彼而離索之憂在茲矣是以懷慕繾綣之辭蓋有不期然而然者孔子曰事其大夫之賢者友其士之仁者由是觀之則四海之間千載之下蓋或有因是而推知其為人者矣吾之序也烏乎辭

復送薛玄卿入京序

世祖皇帝平江南上饒張公以黃老言進得賜號大宗

師出入禁闥者凡四十餘年張公往矣而番禺吳公繼之由是其徒之魁竒俊拔者皆彬彬焉往來京師以為常庚午之秋薛君玄卿復行其交遊間無不詠之歌之以為餞何生大易集而成卷嘗俾余叙其端而臨川彭舉復得若干首亦徵言焉余曰君之行亦光矣是何詩之者之多也或有以美其實或有以勉其所未至其得此於人也亦必有道乎雖然吾竊有私焉吾幼而多疾今駸駸乎其老矣學不足見知於人才不足為時用也

日食米一升酒再觴爾夫豈不知自量者哉顧古之君子亦或有尊德樂義而囂囂然以遊者而吾獨無是心耶吾喪親既已二豎子且長能聚糧治裝斯亦遊矣游必先京師先京師其必以君之師生為東道主下榻之餘借之以一馬導之以一奴望宮闕之偉麗闕明堂辟雖之制而瞻大駕之北巡也其於公卿之間有果能以尊主庇民為已任者吾則求往拜之後來之英有自視不碌碌而能虛心委已者吾亦願與之語然後翱翔乎

灤河之上少栖息乎西山之阿其去也則道東魯禮先
聖之遺像訪三家之子孫如是而歸則終焉而已耳然
不知吾之行也果何時耶又不知吾能行時君無它役
而在京師不耶又不知吾及京師而君無它役其相與
之意有不異於今日不耶姑因是叙而要之亦以塞彭
子之徵云耳

老老堂銘并序

金谿彭萬里年五十而喪配義不忍再娶顧男女若干

人皆幼於是迎其外姑李氏於家以老因扁其堂曰老
老進士朱君元會為之記而請番易李存銘之銘曰

人生伉儷不幸不齊異母異情幾續而睽顧此呱呱孰
恤長之賴外姑存未及於衰亦豈忍心下坐吾帷朝饑
莫寒廢有所離或哺或縫吾女之兒母見子子足忘其
悲子見母母慈而益慈女長而笄男壯而妻薦其甘香
羅拜歲時孰謂人老非吾老為休哉彭君裁變而宜

送張平可序

皇帝四年詔天下以科舉取士秋僕與於州縣之貢歸
自錢塘訪舟玉山縣適與豫章郡張平可同載而下平
可為老子法其眉目江山風雨之色蒼如也携二侍者
一奴詰其所從來則由真而揚而潤而常而蘇而秀而
杭而嚴而衢而至於此時且半載水陸且數千里僕意
平可慕乎玄寂者也亦何故不憚數數爾也頃之平可
又謂余郡有開元觀者久廢吾佐吾師徒手起廢逾二
十年而宮宇以完今教主大真人更名玉虛因誨吾提

點之吾慮夫無飯吾徒者是役也謁財諸貴富者而田
馬僕偶於平可有感也近經上饒道中所見通川橋梁
凡五六大者至百楹槩其瓦石椽桷構結黝堊之費動
數百萬錢而皆白蓮社中人成之彼白蓮社中人非有
公卿貴人之資率多行乞四方亦或伺夫過車馬也者
而丐聚焉嗚呼不亦難矣乎哉雖所見本出於求福利
者而亦博濟之餘義吾則於彼重有感也大江以南學
校之間廩粟之多其名為禮先師修宮牆瞻成後學者

也而來董其事者得不狼戾其間至鮮矣固不當責其
巧貨有為如白蓮社中人者亦豈敢望其竭心力圖祠
事於永久既宇且田以安夫後如為老子法之平可者
乎嗚呼何其儒者之不競也而往往又卑之弗口以為
儒者之業豈於此乎在雖然是豈有聖賢踐修之實特
假夫濶論以自解者耳益以蔽其心之不愧於彼也故
書此以嘉平可之志亦廢以白夫吾黨之士其或有然
吾言者否也

送劉縣尉榮甫序

仕於時者非但無賄之為難而御史之為尤難苟知無
賄已不為狼餐烏攫者之所動搖效甘薦脆者之所盡
惑而不免乎來者之誅求僚友之酬酢妻妾之奉服食
之美未有不中道而變焉者也無賄之難不其然乎其
或確然有以自立毅然有所不為知食君之祿除民之
害而無私焉者義也盡其在已而無祈乎其上脫有不
幸出於防閑之所不及者命也如此則曩之所謂難者

又將有不難者存州縣之胥諳練乎民俗之情偽慣嘗
乎官長之巧拙自其幼而學之壯而行之者無非欺公
罔民之事蓋其祿不足以仰事俯育名未足以取青拾
紫使者之行縣稍有風力而振舉其職者械繫箠楚朝
施久用彼亦何苦而為之故放其良心而不知求者亦
其勢然也勢既如此則其念念之間何適而非私彼其
所掌者分而官長之務總彼其所資謀者衆而官長之
黨寡至又有同僚之暗謬者則託之以為腹心編民之

豪黠者則援之以為黨與御史之難不其然乎其或明
足以燭微而不為其所舐蝕通足以合變而不為其所
陷穽右吾之誠或有以革其面奮吾之斷或有以折其
姦如此則曩之所謂難者亦將有不難者存然能無賄
而不能御史則其政多出於弱而無以及乎物能御史
而不能無賄則其設施多出於術而不可以訓今縣尉
劉君榮甫其於無賄御史兩有所長者與君薄滋味敝
冠履矍然一布衣也出無車馬則杖而徒若未嘗有祿

於時者而其庶稜介厲之氣人不敢干以私他日嘗攝
邑事吏胥之猾玩者往往為之屏氣時鹽法甚嚴也而
君則稽市肆之貿易而貪者不得以偷便郊郭自寧謚
也而君之宵巡未始以寒暑休嘗指其卒徒而謂人曰
若屬文股肱操凶器習鬪事雖曰所以弭凶也而不旁
緣為凶以殘吾民者幾希一有縱橫必痛繩之又嘗親
邏境上異時之行者每託焉以即富貴之家戈槩旁午
雞狗為之不寧君獨裹糧索飧莫則求為仙佛者之廬

而棲焉又嘗曰為入之道正而已矣雖正之為義有精有粗而君之所為殆亦出於天性不皆矯激以為名者也上府之聽讒嫉者嘗欲擠之而公論卒不可泯使者之不辨蒼素者嘗欲抑之而微疵終不能以深中嗟乎非無賄不弱而有及於物者乎非御史不以術而有可訓者乎今聞廣東憲大夫蓋有知之而檄其入幕者矣御史王公又復列其政績於臺矣去此而加勵其平日之志益廣其化民成俗之方將有及於物而可以訓者

益不細矣吾黨好義之士惡得不樂為文辭以勉之哉

贈李晉仲序

吾聞金陵楊公志行之為人也屹立而不阿其涖官也
靳然不可干以私心切慕焉他日得歛人汪君稱隱書
謂嘗於京師識公公為記其堂與菴文甚奇而倦書不
能寄也其甥李晉仲教授餘干有繕本可試從晉仲索
觀之未行會江右道士聶以此從餘干來嘗謁晉仲有
其文亟取讀之初不能以句若崖崩岸斷上下千尺而

輕禽捷獸莫之能緣也若飯臭茹草於窮山絕谷之間而肉食者自鄙也若車馬於羊腸九折之途而御轡策彗之嚴斯須不能忘也遂益有以信公之為而以此又謂晉仲亦綽綽有舅氏風由是不但有慕於公而并願識晉仲焉天歷已巳適當賓興之歲七月之朔客有以晉仲將行告者僕曰余固未識晉仲者也而謂之不知晉仲可乎其行已其績文固皆有所自來雖已受命而及物之志政未自歟是行也升之春官而進對於天子

之廷者非晉仲其誰乎而干越之友亦皆褻然以功名望之形於詩歌者成卷僕因得以平昔有慕於楊公而並欲識於晉仲者叙其端云

贈趙君舜咨奉母之晉康府史序

上饒趙君舜咨以儒家者流為晉康府史至順癸酉之春會有江右之役便道過家奉其母以行其鄉之交友咸為詩文以寵餞之且有介其徵言於僕者僕曰吾見吏於廣海者多矣往往因其物產之富貨寶之聚而民

俗淳且愿也則從而魚肉之夫魚肉之者負君命而失
民望固不待論求其所以樂其身以封殖其子若孫者
尤不足論姑以其名稱美者而言則必將曰欲有以娛
悅乎親者也夫孝子仁人之於其親不使有一毫憂懼
於其心國法至密也人情至險也娛悅於可指可視之
間而憂懼於不睹不聞之際娛悅於俄頃而憂懼於無
窮娛悅於政刑之所或免而憂懼於鬼神之所不可逃
果得為真知愛親者乎今吾子之往役於彼也旦而興

安親而後出也莫而歸安親而後息也是肯以一毫憂懼其心者哉量祿而制用輕煖於身者雖未備旨甘於口者雖有時心舒愉氣和平也心舒愉氣和平則六淫不能賊也六淫不能賊則雖歷險阻犯瘴癘若不出戶庭然子毋疑吾言方今朝廷清明賢公卿擇士如恐不及自求之福終來之吉蓋將有不期然而然者矣

送陳德輔之金陵從閔先生序

夫理有所未燭而過有所未知苟非上智其誰能免不

然犯霜露起險阻躬樵爨甘藿鹽古之人亦胡為乎然
哉蓋其信之也不篤則其求之也不勤其求之也不勤
則其得之也不實疇昔之歲覃懷閔君來遊吾大江之
東而上饒陳氏最先客之其為教也凡進退揖讓之間
奔走使令之際苟有差忒毋或假借其講說經史條貫
悉備若經之有綱若牆之有秋與之處鄙背之氣將洒
洒然而自消既而移家襲慶而陪講於郡庠吾不見且
十年矣至順癸酉六月某日陳氏之子輔不遠二千里

往求焉以卒其業夫師之賢善教者固未易得而子弟之勤且勇不足於己能不難於未聞不膠膠於故常之習不屑屑於囊橐之費為尤未易得吾用是有以知輔之此行也必將有所成矣況金陵為公卿大夫之林苟有餘力更能求其仁者賢者而善事之則輔進也又將有不止於吾所期焉而已也

贈章德輔遊京師序

余往來貴溪上蓋二十餘年溪之南有山特起多怪石

佳樹為弦誦之堂為冠褐之棲余皆累累遊焉獨其山之既曰五面石者未之見也相傳為唐吳緬讀書之所訛而云然意其間必更奇他日果聞為兩石相倚若破而不合仰視其光細而且長人號曰一線天其下閭而深呀然而有容余欲遊之而未果既聞龍虎山中道士章君築宮其間宮成命其猶子德輔主之余於德輔有同舍之好蓋謙靜厚和君子人也亦屢欲招余遊往往以物役孤其意然未始忘也方將以明年春援琴挾冊

其間以有德輔為之東道主也。憩盤石，涉清流，雖累月經年，宜未吾厭。忽一日，德輔過我，謂將為京師遊，且徵言焉。余笑曰：吾方倚子為東道主，以少息嘒嘒擾擾焉者，子其知之而姑為此以拒我耶？殆不知而出於偶然也。人之於其行止，也有不可以意焉如此哉！今吾子之於是役也，一以觀京師之壯麗，次以習宗壇之威儀，問辨於縉紳之林，而翱翔乎鄒魯之郊，聞見者宜日廣，而更嘗者宜日多也。其毋以我為意，吾且為廬阜或武夷。


行也

逢遇錄序

士君子所逢遇之不齊而或不足以汨其心移其志者
古今天下蓋所同也橫槩而賦詩乃在於遇敵制勝之
際而掛經於牛角則又出於勞筋苦骨之餘上饒翁君
以儒家者流而嘗從事於律積歲月可以典州縣之案
牘顧乃暫寓焉於征商之官以其休息取古今雜著有
足以快其心者而類次之久而成帙自題之曰逢遇錄

他日寄以示余余曰甚哉君志之不移而君心之不渝也夫以征商之任嘒嘒乎接於耳者無非物價之低昂紛紛乎交於目者無非商賈之往來窮日之力銖銖然取之於民周月之間則又挈挈然輸之於府田祿之制不及而資格之限甚嚴其所以取給於朝夕者私其贏焉而已耳吾嘗以為雖甚賢者而處此亦不免有以昏其氣而怠其守而君則獨不然且今所集之書無慮數十家亦無慮數千百言取其所可取先之事實以厚其

本次之翰墨以發其文旁之方外以暢其達終之諧謔
以破其拘然則君之所以為人者其庸不可知乎方今
名藩大府之間公卿之賢者多矣而君亦豈久於征商
者哉必將有禮而致之幕下者他日而進是編也夫豈
無一言足以動其心而及於物由是觀之則是編之有
廢乎其不徒矣



侯菴集卷十七

欽定四庫全書

集部

侯菴集卷

十八至二十

詳校官監察御史

臣曹錫寶

中書

臣劉源溥覆勘

總校官知縣

臣楊懋珩

校對官中書

臣嵇承志

謄錄監生

臣熊夢祖

欽定四庫全書

侯菴集卷十八

元 李存 撰

序類

贈鄧深秀地理序

安仁之東南有山蒼蒼然在百數十里外者臨川之雲
林也每聞其間特起而為峰者凡三十六峰之巔泓然
而為龍湫者亦數四清泉懸流下注良田數萬畝歲大
旱不飢而自昔多鄧氏居之而鄧氏之貴且顯者文且

藝者前後蓋相望也余生晚不能皆親薰而炙之今日
叔儀曰汝勵曰季文曰謙伯咸好學而多材而嘗辱友
余元統甲戌之秋則又得深秀焉其氣廉以和其神清
以長問其所成名則曰吾素嗜陰陽家言也余曰子之
藝其必精乎近世之業此者或負販之流子既有詩書
世澤之遠以為之本而又有里居林泉之勝以助之養
泊乎其中而蔚乎其外者非偶然也抑吾又聞雲林之
山東連閩西接贛數百年來以陰陽名世者不出於閩

則出於贛今其徒交迹於東南數十郡間而吾子之居
適當其中歲過而月會之朝漸而暮磨之則其於斯術
詳而不苟也審矣而余又樂於數夫鄧氏之多材且賢
者而及交之也於是乎書

送曾伯明遊廬山序

至順癸酉之秋里人曾杲請曰杲也有千里之役將以
涉匡廬浮漢淮竊聞古之相交友者其出處也必有言
以為贈是役也不無望於執事者存嘆曰人之生也果

可以不遊乎哉。栖乎庭戶之中而恤恤乎壟斷之間。其能自拔而不至於溺焉者。幾希。然有其志而無其時。吾不得而遊也。有其時而無其資。亦不得而遊也。有其資而或不能不憂乎其後。亦不得而遊也。今子之年方壯也。子之居有清溪脩竹之勝。環以壤土。勤力其間。無饑寒之憂。子之親光潤之氣。浮於眉頰。子之兄弟皆足以力門戶。子之子姪皆能以親師友。若子者可謂有其志。有其時。無所慮乎其資。而憂乎其後者矣。子而不遊。

其將誰遊然則登車而攬轡蒼蒼乎吾之左右者孰非
拔地之崖谷解舟而掛席浩浩乎吾之先後者孰非浮
天之波瀾耳目溢乎奇偉胸次無所滓穢則超然之思
廓然之氣誰得而禦之它日之歸吾將有所驗也

贈于子中入京序

元統甲戌之秋于生子中來曰中非有他材能者不自
意將為京師之役先生不可以無語我應之曰吾山澤
之槁也何以語子子既不肯自汨沒於草萊之間亦可

謂有其志矣有其志蓋必有其用也吾聞之少年俊往
之氣離其嚴父兄而外者所當敬其身慎其言而已耳
敬其身毋遊毋酤于酒遊斯荒酤斯疾慎其言毋妄毋
佞妄斯憎佞斯辱矣方今取人之途甚多子苟信吾言
則將自有知子而揚子者矣子勉之

送張玉良入京陳言序

元統二年歲次甲戌十月邑人張玉良來曰僕也雖生
長草澤然稍涉經史不肯自碌碌昧昧故凡政治之得

失未嘗不關於心苟有所自信輒識諸櫝今將陳之闕
下鄉之先輩或辨義利以教我或指昔人之迂且狂者
以戒我吾子獨將安贈余曰新天子明聖三公九卿百
執事多賢也子所言者雖不敢請然吾聞振衣則有領
揭網則有綱不得其領則顛倒而不序不得其綱則紊
亂而不張是故志其大毋截截於其細求其本毋究究
於其末以百執事之所宜為者而告之三公九卿則瀆
矣以三公九卿之所宜為者而聞之天子庸非瀆乎是

故膠於古而不通則腐趣於時而不任則偷方今朝廷
采言者如恐不及亦豈有言之當而弗采乎亦豈有采
之而弗行乎亦豈有行其言而弗顯其身者乎吾用是
有以卜子之行之不徒也

送道士劉彥基入京序

余兒時見冲虛山中道士胡君可善年八十餘兩臉常
如渥丹邑有醮祭必可善主之登壇揚言涵涵如撞鐘
間披氅衣曳竹遨遊廊廡間可畫也其下為張君毅可

亦氣貌恢然實能嚴事胡張之下有陳仲達者涉經史
又博通醫經識藥物療疾病良已年與余相若也而交
最深每相過輒竟日窮宵清言有不知世累之自遠也
胡與張相先後以老死仲達克世其業猶二君存時又
其下為陳則虛屹然若不勝衣雖生長闔閭而諄諄惴
惴猶深山窮谷人則虛之下乃又得劉範焉範哲澤而
長身趣向亦甚不卑亡何而仲達早世思見之不可得
見則虛如見吾仲達焉既而玄教大宗師吳公置之幕

下留京師且十年欲時見亦不可得苟見範又如見則
虛也它日範忽來告曰範將省吾師於京師余歎曰世
固有親父母昆弟遇毛粟利害得失輒白眼反唇相視
猶途之人甚者如怨家仇敵者何也無它重利而輕義
也今子不遠乎萬里不憂乎歲晏聚餽糧犯冰雪凋零
於羈旅之際蕩兀乎舟車之中汲汲焉遑遑焉唯師之
求可不謂加於人一等乎與之厚者咸賦詩焉余得以
推其好修尚義之所由來而又私不足於其往而朝夕

無與遊且言也遂書諸卷端云

藍田八詠詩序

藍田八境者閩道士則齊宋君之所名也君嘗創觀於長樂縣之勝地而居之而得額曰真元凡觀之前後衍沃而為田者曰藍田有橋焉曰藍橋因舊名也相傳古有藍氏主之又謂向居是者嘗種藍以染橋之南有仙人峯以其羣山界邪牽放而此獨超然若仙者之於世俗也又南有紫微峯以是花多產其上也益南有青牛

嶺東二里許有雙髻石皆似而名也然謂之青牛者以老子嘗乘度闕美名之安得如老子者復來斯世乎北有從龍嶺雲氣之所自出天苟欲雨則蓊蓊然歲旱土人於是焉卜雨也又北而南為還源洞流之所自出也是八者皆宋君之所遊息而吾黨之士或詩之或賦之鏘然而金石奏爛然而錦繡敷而未已也夫宋君學仙者也顧乃眷眷然於鄉井釣遊之舊何耶然吾聞仙者之於境也蓋寓焉而無所累焉耳苟遇焉而無所累焉

則必將乘飛雲馭長風而遊乎八極之表而何以藍田之境為於斯時也其視吾黨之所云云者又直夫塵垢秕糠而已矣作藍田八詠詩序

和吳宗師灤京寄詩序

元統二年夏玄教大宗師吳公從駕上都嘆帝業之弘大覩朝儀之光華賦詩二章他日手書以寄其鄉人李某且曰苟士友之過從者宜出之與共歌詠太平也於是聞而來觀者相繼傳錄於四方者尤衆咸以為是作

也和而莊豐而安婉而不曲陳而不肆其正始之遺音
乎夫大宗師以出塵之姿絕俗之氣主朝廷祠祭之事
猶不肯以終食之頃少忘於弦歌之間昔王季之始基
也柞棫斯拔宣王之復古也牛羊為羣此其細事耳而
詩人且雅之頌之仲尼亦存而不刪今國家之大際乎
天而極乎地開經筵以崇聖學設科舉以興俊髦向之
馳馬而試劍者皆彬彬然文學之士矣矧廣堂之上百
執事之中如名康公尹吉甫者亦豈少耶大亨之雅清

廟之頌宜其十倍於古矣於是相與鼓舞而賡載者凡
幾人雖不足以希望盛製抑亦和氣之所形於草萊巖
穴者然也遂書諸卷首

贈上官叔升遊京序

上官岳來曰岳將有京師之役不得朝夕見願賜一言
以自警者余曰吾年運既往而業不加修而何以語子
雖然吾嘗聞之師矣君子之於自厲也莫大於先靜其
心心靜則視聽言動皆得其正矣曰然則心無體吾不

得而執也心無臭吾不得而聞也果惡乎而靜曰寡欲而已耳曰紛紛然接於吾之目者皆可欲也浩浩然入於吾之耳者又皆可欲也亦惡乎而寡曰至聽無聽至視無視非為之為全神守氣由是而國有忠臣由是而家有孝子百祥具集諸福畢至內馳外滯徒以汨吾智而終吾世是謂天德之棄也再拜曰謹受教矣遂書以為別

贈何謙光遊京序

何君大方之子曰柄字謙光言曰柄將舟經乎廬阜之陽浮長淮絕黃河遊鄒魯陳蔡之墟而因以達夫京師吾子柄父之執友也其何辭以贈我余曰吾賤者未嘗習進取之方吾杜門未嘗更途旅之事其將何以告子雖然子之名字固有取於謙卦之義吾更為子申之若何夫柄也者所執者也謙光也者能執夫謙下而道自光明者也天地之道謙也鬼神之道謙也人而不謙天地鬼神舉惡之矣天地鬼神舉惡之矣而世或猶有不

謙者何哉見我而不見人也何以謂之見我而不見人也吾苟有一善焉其心曰我善是人必不善是苟有一知焉曰我知是人必不知是我長而人短也我大而人小也我多而人寡也夫如是則其聲音笑貌初不期於不謙而自不謙矣是故古之君子有聞言而輒拜者有克己以為仁者今而翁以是名子而師以是字子其愛子也深其望子也至而子則又能疊疊焉親師取友而不倦州閭鄉黨之善士而猶以為未足也將求之京師

之會四方之廣守焉而弗失行焉而益著亦可謂尚志不自陸沉者矣在書亦曰謙受益它日之歸吾將改目而視子之容易耳而聽子之辭富貴利達盖有不足言者矣

送劉則誠學錄序

余與覃懷閔君仲魯皆學於上饒陳先生之門先生歿去家維揚踰二十年不相見其神清以夷其質方以正其談經率詳明敷暢使人深聽而鄙吝消余雖思之而

駸駸乎老憊不能具舟命駕多見其不如古之知己者
它日餘干劉則誠來吾山中預言家有別墅維揚得與
閔先生遊者再歲仲魯素風儀整然而則誠進退之禮
殊有師法嘗見薦於淮東憲使得錄高郵儒學之官且
有日州里婚交賦詩以餞而予序其端因告之曰吾子
方以弱冠之年而得官於庠序之間上有博士以主其
教下有賓序以似其勞應酬之所鮮及會計之所不聞
當夙興夜寐資諸人之善而求諸已名之與業胥進而

胥長其將有不可界限者也大江之舟先維揚而後高
郵必當拜師門而行試以吾言質之何如也至正丙戌
九月日作

送程用和序

至元四年冬十有一月餘干程君用和將遊于京師李
存聞而告之曰人之言曰漁必在淵獵必在藪是故志
於當世者不老於丘壑之間勤於五穀者不出於隴畝
之外然則醖明非自言也則國卿安得下堂而執其手

甯戚苟不扣角而歌則終于下里飯牛人矣是故信其有以自達也不必嫌於自前也况吾子敏而周通而不隨其必有所遇合於是行也乎因系之詩曰

秋風起兮山葉黃歲且晏兮浩冰霜子何為兮戒車航
攜束書兮遊帝鄉負修能兮遇明良時不可失兮雖古
人其猶皇皇安得結佩兮相翱翔髮種種兮徒自傷

送于仲元入京敘

信矣問學之無窮也然吾聞得其正而無窮焉則愈造

而愈深失其正無窮焉則愈驚而愈遠吾嘗刻意於文辭詩歌竊自謂苟得彷彿乎漢晉唐宋諸子者斯可矣及獲師友之講明遂朝夕之循習而後知古之人業莫大於盡心而知性盡心而知性而後通於天地萬物之情通於天地萬物之情則言語之際有不求於文而文者矣方將願於有為而未能而人則遑遑以為非好尚不同何足怪也嗜屠博者不近於正冠納履之流喜優獵者自遠於負耒荷鋤之輩勢則然爾昔有五人同席

而酒者其一人甚不嗜也問之故則曰吾憂夫渾神殺氣而事不治也又慮夫漸胃漬鬲而疾也又恐夫傲傲幡幡而人失所瞻視也四人者初相與貌笑之久則慍生焉又久則黜之甚若讎他日酒惟恐斯人之在嗟乎求是非於世俗之下亦奚以異於此生徒于有興雖迹于老氏之門而毅然不以為非事物之來苟有一毫撓乎其心拂乎其氣則必相與洗濯剥落以求庶乎正焉而未已者又將往侍其師而為京師之後數千里之間

風氣之殊山川之阻已有以異於平居几席之安而增
益其所不能者多矣矧夫今天下為一土宇之大生息
之蕃開古以來未之有而士君子生斯時者禮樂教化
之所及宜皆寬通偉博磊落俊拔者也且京師人物之
都會而有興之大宗師張公則歷事四朝恩遇不替而
有加其嗣師吳公則隆厚於親而尊顯之又推以及於
戚姻鄉黨朋友亦無不周且悉焉詩曰庶幾夙夜以永
終譽又曰孝子不匱永錫爾類其二公之謂歟今有興

之行內取則於其師外取友於天下所以陶成其美者
備矣他日歸動乎容貌發乎聲音吾將明目而視傾耳
而聽之焉若夫圖私便而尚紛華則決非好古者之所
為又奚必煩言而瀆告之也

送楊霆發序

五嶽四瀆山川精氣之所萃也而衡岳獨鎮大江之南
去海為最近國朝以來益嚴其祀而崇其神未嘗有巨
浸赤地千里之憂且山之中半為浮屠老氏之棲者非

一而所謂壽寧宮者境愈勝制愈宏實岳神之所安也
朝廷歲時祈報之使往往而踵至是故居遊於其間者
率魁竒焉至元丙子之歲臨川道士楊君霆發以素有
道術一再為邦君禱雨輒應由是捧其主教大宗師之
檄知本宮事將行其弟子楊當請凡郡之名能文辭者
咸詩焉當嘗從余遊而徵序言於余也余聞古方外之
士其神疑使物不疵癘而年穀熟楊君豈亦慕而為之
者歟禱祈之效固出於邦君之誠亦其精神之所感也

今則又與於衡岳祠官之次雲霧之所蒸潤風雷之所
通暢變化在於俄頃影響見於眉睫欲暘而暘欲雨而
雨則其及於物者不更廣且易乎若徒曰會計出入於
簿書之間如俗有司之為者則末矣楊君未必然也

送張自賓序

余與宗人同叟幼相狎也稍長同叟著道士服龍虎山
中不相見者動十四五年同叟得清靜之境其文學疊
疊焉以進而予則徒汨沒塵埃以老每用愧於同叟也

他日以書來數其友張自賓之賢且將遠遊頗有意余
文之未幾陳汝欽亦其山中人來卧疾余俟菴自賓一
再有書問之竊觀多責善之辭汝欽因謂自賓家在江
之右父年八十而康強書無所不讀自賓之居山中也
每得其家帖未嘗無規勉之言余益信自賓之賢益信
自賓之賢盖有由來宜乎同叟汝欽之與之也夫龍虎
多賢德多材藝後來秀樾問學而考業裕乎其有人哉
而自賓又得家君之嚴有栖息之安有遊覽之勝有切

磋之地過乎人者多矣而又欲徧歷名山大川之間庶
幾得所未見聞者此則自賓之所以自廣自成也其孰得
而槩之顧予言未足為自賓贈亦聊以謝同叟并勉汝欽
云

侯菴集卷十八